

2023ko Aberri Eguneko LABen adierazpena **EUSKAL ERREPUBLIKA POSIBLE EGIN DEZAGUN**

Aberria: elkartasun eta elkar zaintzarako espazioa

Jendarte eraldaketan aritzen garenontzat, aberria ez da abstrakzio soil bat, elkarrekin bizitzeko eta ekiteko espazioa baizik.

Aberria bada elkarrizketarako esparru bat, euskara gure berezko hizkuntzaren bidez garatzen den elkarrizketa.

Aberria bada, halaber, elkar bizitza demokratikorako espazio bat, gatazka armatu luze baten ondoren eraikitzen ari garena.

Aberria da, herri burujabetza, pertsona librez osatutako Errepublika librea, eratzeko gunea.

Eta aberria bada, nola ez, elkartasun eta elkar zaintzarako espazioa.

Bi hautu estrategiko elkarren arteko lehia

Egungo bidegurutze historikoan badira bi hautu estrategiko elkarren lehia. Lehena, krisi anizkoitzari betiko errezetekin erantzutea, Kapitalaren mesedetan herriak eta langileak desjabetuz eta ekosistemak hondatuz. Horixe da elite ekonomikoen hautua. Horixe da Europako herriak elkarren aurka jarri dituen gerra estrategiaren helburua.

Bigarren aukera, herri guztien eskubideak aintzat hartuko dituen nazioarteko harreman berriak sortzea. Pertsona guztien eskubideak erdigunean jarriko dituen eredu sozioekonomiko berrirako trantsizioa sustatzea. Hauxe da gure hautua eta horren alde emango dugu gure onena.

Eredu berriaren oinarria: banaketa hirukoitza

Eredu sozioekonomiko berria banaketa hirukoitzan oinarritzea proposatzen du LABek: enpleguaren banaketa, zaintza lanen banaketa eta ondasunaren banaketa.

Euskal herritar guztiok (bertan jaiok nahiz beste herrialde batzuetatik heldutakoak) badugu ondasunaren sorreran parte hartzeko ardura eta eskubidea, bai 30 orduko enplegu bermatuaren bidez baita zaintza lanen banaketa erantzunkidearen bidez.

Eta era berean, denok dugu sortutako ondasunaz baliatzeko beharra eta eskubidea, 1.400 euroko gutxieneko diru-sarreraren bidez nahiz osasuna, zaintza edota hezkuntza eskubideak bermatuko dituzten doako zerbitzu publikoen bidez.

Euskal Herrian posible egin dezagun

Euskal Errepublika independentea dugu ortzimugan. Euskal Errepublika da herri burujabetzarako bermea, bizi erdigunean jarriko duen eredu berria eraikitzeko aukera.

Euskal Errepublika, aldarrikapena ez ezik, egitasmo politiko partekatua behar du izan. Eguneroko praktika independentista eta eraldatzailearen bidez sustatuko dugun egitasmoa.

Gaurdanik hasita, Madril eta Parisen ezinezkoak diren aldaketa sozialak Euskal Herrian posible egiteko ibilbidea egin beharra dago. Politika publikoen norabidea lehiatuz eta burujabetzaren bidean aurrera eginez.

Eusko Jaurlaritzak, Nafarroako Gobernuak eta neurri txikiagoan Ipar Euskal Herriko Euskal Elkargoak badituzte zerga eta aurrekontu politikari dagokionez zenbait eskumen eta horiek langile jendearen alde erabiltzeko interpelazio instituzionalean sakontzera doa LAB, langileen borroka esparru guztietara eramanez.

Halere bistan da aipatu eskumenak ez direla nahikoak eredu sozioekonomikoa eraldatu eta banaketa hirukoitza sustatzeko. Eremu ekonomiko eta laborala errotik aldatzeko tresna berriak behar ditugu, besteak beste Euskal Lan Kodea eta Euskal Gizarte Segurantza, baita sistema publiko burujabea garatzeko ahalmen osoa. Euskal Errepublika independente baten norabidean estrategikoak diren estatu tresnak dira horiek. EAE, Nafarroa edota Ipar Euskal Herriko estatusen berrikuntzaz aritzerakoan lehentasunez eskuratu beharrekoak.

Eraldaketa urratsak

Euskal Herrian bada nazio eraikuntzaren eta banaketa politiken aldeko esparru sozial, sindikal eta politiko zabala. Berau egituratu eta eraginkortzea da erronka, Euskal Herria ardatz izango duen trantsizio feminista eta ekosozialista bultzatuz. Hori bideratuko duen akordio handi baten zain egon gabe, akordio txikiak egitea da urratsak emateko modurik onena.

Urrats horietako bat da Euskal Herriko Mugimendu Feministak proposatu duena: zainduak izateko eskubide unibertsalaren aitortza eta zaintza sistema publiko komunitarioaren eraikuntza. Greba feminista Orokorra aukera ona izango da elkar zaintzan oinarritutako aberria eraikitzeko.

Beste urrats bat, euskal pentsiodunen mugimenduak proposatutakoa: Eusko Jaurlaritzak eta Nafarroako Gobernuak gutxieneko pentsioa 1.080 euroraino osagarritzea. Edota, Gasteizko Legebiltzarrak onartutako mozioa, 1.400 euroko gutxieneko soldataren aldekoa.

Horrelako urratsek eraldatzen dute errealitatea, horrelako urratsak sustatzeko egin behar dugu borroka. Burujabetza aldarrikatu ez ezik, burujabetzarako ibilbidea eginez.

Aldarrikapen eta mobilizazioarako deia

Aipatutako irakurketan oinarrituz, Aberri Egunaren testuinguruan antolatutako ekimenetan parte hartzeko deia egiten du LABek.

- Ernaik Elorrion antolatutako Gazte Topagunearen baitan, Garbiñe Aranburu koordinatzaile orokorrak hitzaldia izango du.
- Euskal Herria Baterak Donostian antolatu duen ekitaldian Igor Arroyo koordinatzaile orokorrak eta Argitxu Dufau Ipar Euskal Herriko bozeramaileak parte hartuko dute.
- Bagira ekimenak Itsasun antolatutako ekitaldietan nahiz EH Bilduk Iruñean antolatutako manifestazioan ere LABeko ordezkariak bana izango da.

Euskal Herrian, 2023ko apirilean